

蜀鑑卷第八

孟知祥董璋連兵拒命

後唐莊宗同光三年以孟知祥為西川節度使



郭崇韜之伐蜀也以孟知祥有薦引舊恩將行言於上曰知祥信厚有謀可為西川帥崇韜素與董璋善蜀平崇韜表為東川節度使詔以孟知祥為西川節度使

紹琛反於蜀魏王繼岌使工

部尚書任圜討平之孟知祥討定餘寇
平蜀之役紹琛功為多董璋位居下帥
東川紹琛不能平會郭崇韓誅紹琛謂
董璋曰欲復占囑誰門耶璋懼謝罪魏
王繼岌至武連遇敕使諭以令董璋將
兵誅朱令德紹琛以不見委大驚俄而
璋過不謁紹琛怒自劔州擁兵西還自
稱西川節度使詔以任圜討之董璋兵
二萬會任圜討紹琛至漢州紹琛逆戰
張礪請以羸兵誘之圜從之紹琛大敗

閉城不出漢州無城槩枝木為柵圜攻
焚之紹琛戰敗奔綿竹追擒之蜀中羣
盜猶未息知祥擇廉吏使治州縣與民
更始遣趙廷隱將兵分討羣盜悉誅之
天成三年遣李仁矩如兩川

詔令西川獻一百萬緡東川五十萬緡
皆辭以軍用不足西川獻五十萬緡東
川獻十萬緡

以李仁矩為保寧節度使夏魯奇為武信
節度使

詔割果閬二州以仁矩為節度使安重
誨之謀也又詔綿州刺史武處裕將兵
赴治又使武信節度使夏魯奇治遂州
城隍繕甲益兵戍之董璋孟知祥大懼
璋素與知祥有隙至是結為婚姻謀併
力以拒朝廷

長興元年董璋築寨劍門與孟知祥上表
拒命

董璋遣兵築七寨於劍門孟知祥遣趙
季良詣璋修好還言璋貪殘好勝終必

為患知祥與璋上表言兩川聞朝廷於
閬中建節綿遂益兵無不憂恐詔書慰
諭之璋表武處裕兼行軍司馬囚之府
廷又閱集民兵皆剪髮黥面復於劍門
北置永定關布列烽火

兩川節度使董璋孟知祥連兵反璋擊閬
州知祥遣李仁罕等攻遂州侯弘實會璋
攻閬州

知祥謀於趙季良季良請以東川先取
遂閬然後併兵守劍門知祥從之遂使

約董璋同舉兵

董璋陷閬川殺李仁矩

詔削董璋官爵遣石敬瑭討之

以孟知祥兼供饋使石敬瑭為招討使
夏魯奇副之

孟知祥遣李仁罕圍遂州

夏魯奇嬰城固守孟知祥命高敬柔帥
資州義軍二萬築長城環之魯奇遣馬
軍都指揮使康文通出戰文通以其眾
降於仁罕

董璋攻利州不克

知祥聞之曰北破閬中正欲徑取利州
其帥不武必望風遁去吾獲其倉廩據
漫天之險北軍終不能西救武信令董
公辟處閬州遠弃劔閣非計也。漫天
山名在利州

孟知祥遣張武將水軍趣夔州

武至渝州刺史張環降之遂取瀘州遣
朱偓分兵趣黔涪

削孟知祥官爵并討之

石敬瑭襲劔門克之王弘贄等破劔州退
保劔門

石敬瑭入大散關王弘贄等引兵出人
頭山後過劔門之南殺東川兵三千人
據而守之弘贄等破劔州而大軍不繼
乃焚其廬舍取其資糧還保劔門。人
頭山在利州昭化西

孟知祥遣李肇據劔州趙廷隱自遂州將
兵會屯劔州李筠向龍州董璋將兵屯木
馬寨

知祥聞劔門失守大懼曰董公果誤我
矣遣李肇將兵五千赴之戒之曰爾倍
道兼行先據劔州北軍無能為也又遣
使詣遂州令趙廷隱將萬人會屯劔州
又遣李筠將兵四千趣龍州守要害董
璋自閬州將兩川兵屯木馬寨先是西
川牙內指揮使龐福誠謝錕屯來蘇村
聞劔門失守相謂曰使北軍更得劔州
則二蜀勢危矣遽引兵部千餘人間道
趣劔州始至官軍萬餘人自北山大下

會日暮二人謀曰衆寡不敵逮明則吾屬無遺矣福誠夜引兵數百升北山大譟於官軍營後鎧帥餘衆操短兵自其前急擊之官軍大驚空營遁去復保劍門十餘日不出孟知祥聞之喜曰吾始謂弘贄等克劍門徑據劍州堅守其城或引兵直趣梓州董公必奔閬州奔還我軍失援亦須解遂州之圍如此則內外受敵兩川震動勢可憂危今乃焚毀劍州運糧東歸劍門頓兵不進吾事濟

矣。木馬寨距劍州十里來蘇近劍門小路也劍門南清疆對與大路合

王弘贄等遣兵分道向文州

官軍將襲龍州為西川潘福超等所敗董璋遣前陵州刺史王暉將兵三千會李肇等分屯劍州南山

石敬瑭進屯劍州不利退屯劍門

敬瑭屯劍州北山趙廷隱陳兵於牙城後山李肇王暉陳於河橋敬瑭引步兵進擊廷隱廷隱擇善射者五百人伏敬

蜀鑑 卷八 六
塘歸路按甲待之矛稍欲相及乃揚旗
鼓譟擊之斬百餘人敬瑭又使騎兵衝
河橋李肇以強弩射之騎兵不能進薄
暮敬瑭引去廷隱引兵躡之與伏兵合
擊敗之敬瑭還屯劔門

詔遣安重誨督征蜀諸軍

石敬瑭本欲不西征及重誨西出乃累
表諭奏以為蜀不可伐明宗頗然之

長興二年孟知祥兵陷遂州守將夏魯奇
死之

魯奇有廟在遂府

召安重誨還石敬瑭引兵遁歸兩川兵追
之陷利州

石敬瑭以遂閭既降糧運不繼燒營北
歸軍前以告孟知祥知祥匿其書謂趙
季良曰北軍漸進柰何季良曰不過綿
州必遁知祥問其故曰我逸彼勞彼懸
軍千里糧盡能無遁乎知祥大笑以書
示之兩川兵追敬瑭至利州李彥琦奔
城走兩川兵入利州知祥以趙廷隱為

昭武留後

遣兩川將吏還諭本鎮

安重誨以讒誅遣西川進奏官蘇愿果州軍將劉澄各還本道諭以安重誨專命興兵今已伏辜孟知祥遣使告董璋欲與之俱上表謝璋怒曰孟公親戚皆完璋已族滅尚何謝為由是復為怨敵孟知祥遣李肇守利州

昭武留後趙廷隱請兵於孟知祥欲以取興元及秦鳳知祥不許廷隱以頃在

劍州與李肇同功願以昭武讓肇知祥褒諭不許廷隱三讓知祥從之

孟知祥圖

明宗天成元年孟知祥增置營兵

知祥陰有據蜀之志閱庫中得鎧甲二十萬置左右牙等兵十六營凡萬六千人營於牙城內外又置左右飛棹兵六營凡六千人分戍濱江諸州習水戰以備夔峽

以趙季良為三川制置轉運使李嚴為西

川都監

郭崇韜率蜀中富民輸犒賞錢五百萬
緡晝夜督責有自殺者給軍之餘猶二
百萬緡至是任圜判三司知成都富饒
遣季良為三川都轉運使蜀人欲皆不
與知祥曰府庫他人所聚輸之可也州
縣租稅以贍鎮兵決不可得季良但發
庫物不敢復言制置轉運職事矣安重
誨以知祥及東川節度使董璋皆據險
擁兵又知祥乃莊宗近姻陰欲圖之季

嚴自請為西川監軍

天成二年孟知祥殺李嚴

高季興襲取夔州

季興請夔忠萬州為屬郡唐主許之又
請自除刺史不許季興輒遣兵突入夔
據之又襲涪州不克魏王繼岌遣押牙
韓珙等部送蜀珍貨四十萬浮江而下
季興殺而掠之朝廷詰之對曰欲知覆
溺之故自宜按問水神帝以劉訓為南
面招討使夏魯奇為副招討使東川節

蜀鑑 卷八 九
度使董璋將蜀兵下岐會湖南兵三面
進攻

以趙季良為西川副使
從孟知祥之請也

唐蜀兵敗荆南軍取夔忠萬州

孟知祥發民丁二十萬修成都城

天成三年孟知祥置三場於漢州權鹽

孟知祥屢與董璋爭鹽利璋誘商旅販

東川鹽入西川知祥患之乃於漢州置

三場重征之歲得錢柒萬緡商旅不復

之東川

詔發西川兵戍夔州孟知祥請免之

毛重威將三千人往知祥奏夔忠萬三

川已平請召戍兵還以省饋運帝不許

重威帥其衆鼓譟逃歸帝命按其罪知

祥請而免之

長興元年孟知祥割雲安鹽監隸西川

知祥累表請割雲安等十三鹽監隸西

川以鹽直贍寧江屯兵許之

長興二年孟知祥兵陷忠萬夔州

蜀鑑 卷八 七
知祥以李仁罕為岐路招討使將水軍東畧地至夔州寧江節度使安崇阮弃鎮自均房逃歸

孟知祥擊東川全有蜀地

長興三年董璋襲西克漢州

董璋會諸將謀襲成都皆曰必克前陵州刺史王暉曰劍南萬里成都為大師出無名必無成功璋不從孟知祥遣潘仁嗣將三千人詣漢州詞之璋入境破白楊林鎮潘仁嗣與戰于赤水大敗為

璋所擒璋遂克漢州

孟知祥遣趙廷隱拒董璋知祥出與璋戰璋遁走

廷隱將三萬人拒之知祥留趙季良守成都自將兵八千趣漢州至彌牟鎮趙廷隱陳於鎮北遲明廷隱陳於雞蹤橋璋望西川兵盛退陳於武侯廟下璋帳下驍卒大譟曰日中曝我輩何為何不速戰璋乃上馬前鋒始交東川張守進降於知祥言璋兵盡此無復後繼當急

擊之知祥登高冢督戰毛重威李敬塘
守雞蹤橋趙廷隱三戰不利知祥懼以
馬箠指後陳張公鐸帥衆大呼而進東
川兵大敗死者數千人擒其親兵八十
餘人璋拊膺曰吾何依乎與數騎遁去
餘衆七千人降知祥引兵追璋至五侯
津趙廷隱追至赤水○赤水在漢州東
彌牟鎮有武侯八陣圖雞蹤橋在彌牟
鎮五侯津在瀾濛水李膺益州記云昔
有人姓侯兄弟五人住此水側皆武勇

殷富俗人呼為五侯水

董璋歸東川王暉殺董璋降於知祥

知祥入梓州遂定東川

長興四年以孟知祥為東西川節度使蜀
王

閔帝應順元年孟知祥稱帝

唐山南節度使張處劉武定節度使孫漢
韶以兩鎮降

遂有山南洋川之地乃命李肇將五千
人還利州張業將兵一萬屯大漫天以

迎之

孟昶得階成秦鳳四州

昶明德十年漢秦州節度使何重建以秦州降

據五代史蜀檮杌亦同

階州刺史王君懷以州降

據通鑑

昶遣孫漢韶攻鳳州下之遣何重建攻成州克之

攻鳳州據五代史云克成州據蜀檮杌

於是盡有王衍故地蜀檮杌云遣李廷珪非孫漢韶也今從之又通鑑書此殊略

周世宗伐蜀取四州

周世宗顯德二年韶遣鳳翔節度使王景伐蜀

王景拔黄牛寨蜀將趙季札遁歸蜀主昶斬之

世宗常憤中國日蹙有削平天下之志會秦州民夷有獻策請恢復舊疆者帝

納其言蜀主聞之遣趙季札按視邊備季札以文武才畧自任使還請自行世宗遣王景伐蜀自散關趣秦州王景拔黃牛寨季札至德陽聞周師入境懼不敢進單騎馳還成都蜀主怒斬之。黃牛寨在鳳州東州去興趙原四十里原去寨十五里

王景敗蜀師於黃花谷蜀師皆潰取秦階成州

宰相以景等久無功饋運不繼固請罷

兵帝命我

太祖皇帝往視之還言秦鳳可取之狀

帝從之蜀李廷珪遣先鋒都指揮使李

進據馬嶺寨又遣奇兵出斜谷屯白澗

又分兵出鳳州之北唐倉鎮及黃花谷

絕周糧道閏月王景遣裨將張建雄將

兵二千抵黃花又遣千人趣唐倉扼蜀

歸路蜀染院使王巒將兵出唐倉與建

雄戰於黃花蜀兵敗奔唐倉遇周兵又

敗虜巒及其將士三千人馬嶺白澗兵

皆潰李廷珪高彥儔等退保青泥嶺蜀
雄武節度使韓繼勳奔秦州奔還成都
斜谷援兵亦潰成階二州皆降蜀人震
恐○馬嶺寨在鳳州之西去州三十五
里白澗鎮在鳳州唐倉鎮及黃花谷在
北川水上水經注北川水出北洛掄山
南流逕唐倉城下黃花谷水亦出此山
寰宇記云唐倉鎮入蜀要路魏將唐倉
於此柵而立倉廩故謂之唐倉柵廢黃
花縣在今鳳州梁泉縣

王景克鳳州取之

王景等圍鳳州韓通分兵城固鎮以絕
蜀之援兵遂克鳳州擒其節度使王環
及都監趙崇溥等將士五人崇溥不食
而死制曲赦秦鳳階成境內其四州之
民二稅徵科之外凡蜀人所立諸色科
徭悉罷之○固鎮屬鳳州

論曰王建益知祥乘世之亂盜有土宇
塵汙華岷論蜀者羞稱焉然建之入蜀
也十有七年始偽定蜀地知祥之據蜀

也奕世而后能有階成秦鳳四州襲而取之可謂難矣及其亡也兵不戰而自潰褒斜劔閣如涉無人之境焉果何足恃哉易曰天險不可升也地險山川正陵也王公設險以守其國所謂設險者以人為險也故曰固國不以山谿之險一士之賢於長城也久矣區區之蜀何足道哉

本朝王全斌下蜀

太祖皇帝乾德二年以王全斌為鳳州路

都部署劉光義為歸州路副都部署分道伐蜀

蜀知樞密院王昭遠說蜀主遣使并門發兵南下而蜀自黃花子午谷出兵應之使中原受敵以窺關右之地蜀主遣趙彥韜等齎蠟彈帛書遺北漢主劉鈞約兵濟河同舉入寇彥韜至都下取其書以獻上笑曰吾西討有名矣翰林鑿官穆昭嗣初事高季興上問以蜀中地理昭嗣曰荆南即西川江南廣南

都會也今以克此則水陸皆可趨蜀
上笑於是命全斌等分道進討 上出
畫圖謂全斌等曰西川可取否裨將史
延德前奏曰西川在天上固不可到在
地上即平矣蜀主聞有北師以王昭遠
等帥兵拒戰

十二月王全斌取興州

全斌等攻拔乾渠渡萬仞燕子等寨遂
取興州敗蜀兵七千人獲軍糧四十餘
萬石刺史藍思綰退保西縣全斌又攻

石圖魚關白水閣二十餘寨皆拔之
蜀山南節度使韓保正弃城走史延德入
興元追獲之蜀軍退保葭萌

保正聞興州破遂弃山南退保西縣史
延德以先鋒至保正懦弱不敢出遣兵
數萬人依山背城結陣自固延德擊走
之追擒保正及其副李進獲糧三十餘
萬斛裨將崔彥進與康延澤等逐北過
三泉遂至嘉川殺虜甚衆蜀軍燒絕棧
道退保葭萌

劉光義入夔州蜀守將高彥儔死之
光義等連破松木三會巫山等寨殺其
將南光海等生擒戰棹使袁德宏奪戰
艦二百餘艘又斬獲水軍六千餘衆初
蜀於夔州鎖江為浮梁上設敵棚三重
夾江列礮具光義等行上出地圖指
其處謂曰沂流至此切勿以舟師爭勝
當先遣步騎潛擊之俟其稍却乃以戰
棹夾攻可必敗也光義等未至鎖江三
十里許捨舟前奪浮梁復引舟而上遂

頓兵白帝廟西守將高彥儔謂其副趙
崇濟武守謙曰北軍涉險遠來利在速
戰宜堅壁待之守謙曰寇據吾城下而
不擊又何待也遂領千人以出光義已
遣張廷翰等引兵與守謙戰於猪頭鋪
守謙敗走延翰等乘勢登其城彥儔整
衆出鬪而延翰等已入其城中矣彥儔
力戰不勝身被十餘創左右皆散去彥
儔奔歸府弟判官羅濟勸彥儔歸蜀彥
儔曰我昔已失秦川今復不能守此縱

蜀鑑
卷一
人主不殺我我何面目見蜀人乎解符
印授濟反拒其戶整衣冠再拜登樓縱
火自焚

王全斌入利州

全斌以蜀人斷棧大軍不得進議取羅
川路入蜀康延澤潛謂崔彥進曰羅川
路險衆難並進不如分兵修棧約會大
軍於深渡可也彥進遣白全斌許之不
數日間道成遂進擊金山寨又破小漫
天寨而全斌亦以大軍由羅川至深渡

與彥進會蜀人依江而陳彥進遣張萬
友等擊之奪其橋會暮夜蜀人退保大
漫天寨明日彥進延澤萬友分兵三道
擊之蜀人悉其精銳來拒又大破之乘
勝拔其寨王昭遠趙崇韜引兵來戰三
敗追奔至利州北昭遠等遁去渡桔柏
津焚浮梁退保劔門全斌等入利州獲
軍糧八十萬斛

乾德三年正月王全斌等入劔州

蜀主聞王昭遠等敗甚懼乃募兵守劔

門命太子玄喆為元帥王全斌等自利
州趨劔門次益光會議曰劔門天險古
稱一夫荷戈萬夫莫當諸君宜求進取
之策軍頭向韜曰得降卒言益光江東
越大山數重有峽名來蘇蜀人於江西
置柵對江可渡自此出劔門南二十里
至青彊店與官道合若大軍行此路則
劔門之險不足恃也全斌等欲赴之康
延澤曰蜀人數戰數敗胆氣奪矣可急
攻而下且來蘇狹徑主帥不可自行但

可遣一偏將往耳若抵青彊北與大軍
夾擊劔門昭遠等必成擒矣全斌等然
之命史延德分兵趨來蘇跨江為浮梁
以濟蜀人見之弃寨而走延德遂至青
彊王昭遠等引兵退駐漢源坡留其偏
將守劔門全斌等以銳兵奪擊破之及
漢源趙崇韜布陳策馬先登昭遠據胡
床不能起崇韜戰敗猶手斬數人乃被
執昭遠免胄弃甲而逃全斌等遂取劔
州昭遠為追騎所獲太子玄喆等皆媿

蜀鑑 卷八 十一
游不卹軍政至綿州聞劔門已破棄軍
西還

王全斌次魏城蜀主孟昶以表請降全斌
等入成都

蜀老將石奉頽請聚兵堅守蜀主嘆曰
吾父子以豐衣美食養士四十年一旦
遇敵不能為吾東向放一箭今雖欲閉
壁誰肯效死者李昊勸昶降迺遣伊審
微奉降表詣軍前

劉光義曹彬自夔門會王全斌等於成都

光義等發夔門萬施開忠等刺史皆迎
降至遂州知州陳愈亦降諸將所過咸
用屠戮以逞曹彬禁之乃止故峽路兵
始終秋毫不犯至成都王全斌等縱部
下掠奪子女曹彬屢請旋師不聽其後
事具國史茲不著

論曰唐末五代宇縣分裂歷七姓十二
君垂五十餘年僅守中原之境自江以南
割而為四僭竊蜂起豈獨建與知祥而
已哉我

宋龍興削平僭偽昶不率先諸侯以朝京師而

天討所加方且尤其豐衣美食之不足以得士抑愚矣

王師既定蜀繼此下江南俘李煜而車書混一

列聖撫摩覆育深仁厚澤淪肌浹髓

中興以來虎臣宿將極力杆禦如手足之衛頭目民之戴

宋有死無二三百年猶一日也夫以

藝祖之宵旰以圖蜀其艱且勤也如此蜀在

今日為上流之垂也如此保蜀如保元氣猶懼不支况輕視而淺謀乎念

祖宗有蜀之勤而顧

今日保蜀之不易則昔人之得失可不為永鑒歟

蜀鑑卷第八

蜀鑑卷第九

西南夷本末上

西南夷在蜀徼外非細故也漢武帝始置郡縣叛服不常屢見於史今從通鑑繫年書之武都氏羗至楊氏而始大其後遂為階成興鳳等州為蜀之藩籬已別見不著于此

漢武帝元光四年拜唐蒙為中郎將使通南武始置犍為郡

初建元六年王恢元討東越也使番陽

令唐蒙風曉南越南越食蒙以蜀蒟醬
蒙問所從來曰道西北牂柯江牂柯江
廣數里出番禺城下蒙歸至長安問蜀
賈人賈人曰獨蜀出蒟醬多竊持出市
夜郎夜郎者臨牂柯江江廣百餘步足
以行舡南越以財物役屬之然亦不能
臣使也蒙乃上書曰南越王名為外臣
實一州主也今以長沙豫章水道多絕
竊聞夜郎精兵可十餘萬浮船牂柯出
其不意此制越一奇也請道夜郎道為

置吏上乃拜蒙為中郎將將千人從筰
關入見夜郎侯多同厚賜之喻以威德
約為置吏多同等貪漢繒帛以為道險
漢終不能有乃且聽約蒙還報上以為
捷為郡。華陽國志曰昔楚威王遣莊
蹻沂沅水出苴蘭以伐夜郎植牂柯繫
船於是苴蘭既克夜郎又降而秦奪楚
黔中地無路得通遂留王滇池因名苴
蘭為牂柯國注牂柯繫船棧也後漢注
牂柯江中名山也笮關在沉黎郡又云

捷為郡治。鬯元光五年，又治南廣。水經注云：鬯水出符縣南，不狼山縣有捷山。後漢史注：鬯水過牂柯郡，出沅江。水經注云：東逕沅水，出苴蘭東。逕辰陽南，又逕沅陵縣。西寰宇記云：唐播州夷州費州莊州，即秦夜郎。苴蘭縣之西北隅。今珍州亦其地。又西高州有夜郎縣，牂州建安縣有古牂柯郡城。西近施黔東近辰沅，皆其境也。鬯縣水出符縣，今瀘州合江縣，即符地。南廣，今叙州南溪縣，亦

其地。鬯與南唐皆在都江之南也。拜司馬相如為中郎將，通西夷，置都尉。

唐蒙發卒治道數萬人，自犍道指牂柯江，士卒多物，故有逃亡者，用軍法誅之。巴蜀民大驚，上使司馬相如責蒙等，因諭告巴蜀民，以非上意。相如還報時，叩笮君長聞南夷得賞賜多，欲請吏上問相如。相如曰：叩笮再驩，近蜀易通，為置郡縣，愈於南夷。上乃拜相如為中郎將，建節徃使，因巴蜀吏幣物以賂西夷，皆

請為內臣除邊關盜斥西至沫若水南至牂柯為徼通靈關道橋孫水以通印都為置一都尉十餘縣屬漢天子大悅○靈關道漢地理志屬越雋郡寰宇記靈關山在雅州廬山縣北二十里峯嶺嵯峨靈關鎮在廬山縣北八十二里四向險峻控帶蕃蠻一夫守之可以禦百蜀都賦云廓靈關而為門印徠山本名印笮即印人笮人之交印徠關在雅州榮經縣孫水本名長河水又曰沙水出

雋州臺登縣繩水出徼外若水南至大笮入繩

元朔三年罷西夷置南夷夜郎兩縣一都尉稍令捷為自保守就○注自保守且脩其城郭元狩元年博望侯張騫使西域始通滇國復事西南

張騫自月氏還具言西域諸國風俗大宛在漢王西可萬里大夏在大宛西南與大宛同俗臣在大夏時見印竹杖蜀

布問曰安得此大夏國人曰吾賈人往市之身毒身毒在大夏東南可數千里其俗土著與大夏同以騫度之大夏去漢萬二千里居漢西南今身毒國又居大夏東南數千里有蜀物此其去蜀不遠矣今使大夏從蜀宜徑天子既聞大宛及大夏安息之屬皆大國多奇物土著頗與中國同業而兵弱貴漢財物誠得而以義屬之則重九譯致殊俗威德徧於四海欣然以騫言為然乃令騫因

蜀捷為發間使四道並出求身毒國各行一二千里其北方閉氏笮南方閉雋昆明終莫得通於是始通滇國乃復事西南夷。滇池寰宇記秦惠王破滇池此地始通華陽國志云滇池縣治滇國有澤水周回二百里所出涑廣下流淺狹如到流漢為益州郡治蜀漢又改為晉寧郡唐為昆州滇池在晉寧縣隸戎州都督北接雋州戎州今叙州也元鼎大年苴蘭君反平之以為牂柯郡夜

郎侯入朝以為夜郎王以邛都為越雋郡
笮都為沈黎郡冉駝為汶山郡廣漢西白
馬為武都郡

武帝又誅邛君并殺笮侯冉龐之戎等
皆震讐乃置四郡。苴蘭夜郎牂柯已
見上寰宇記云郡有越水雋水皆出深
羗界言越雋者以彰威德也越雋郡在
黎州徼外唐置昆明縣以南接昆明夷
越自雋以東北君長以十數笮都最大
為沈黎郡今黎州之境是也自笮以東

北君長以十數冉駝最大置汶山郡今
茂州諸羗是也在蜀之西自駝以東北
君長以十數白馬最大置武都郡今階
成興鳳文州等境是也今茂州有路可
通文州元封三年武都氏反分徙酒泉
今附見此

元封二年遣將軍郭昌發兵擊滇滇王降
置益州郡

元狩二年上將討昆明以昆明有滇池
方三百里乃作昆明池以習水戰滇王

者其衆數萬人其旁東北有勞深靡莫皆同姓相仗未肯聽帝乃遣郭昌發巴蜀人擊勞深靡莫以兵臨湏湏王舉國降請置吏入朝於是以為益州郡。漢史夜郎之西有靡莫之屬以十數湏寂大北接雋州名為雋昆明在叙州徼外已詳見上注益州治昆明也

孝昭帝始元元年益州牂柯夷反募吏民發奔命擊破之

益州廉頭姑繒民反殺長吏牂柯談指

同並等二十四邑凡三萬餘人皆反遣水衡都尉發蜀郡犍為奔命萬餘人擊牂柯大破之。廉頭姑繒未祥談指同並皆漢牂柯郡屬縣並音伴

始元四年始繒葉榆復反遣呂辟胡將兵擊之

辟胡不進蠻夷遂殺益州太守乘勝與辟胡戰士溺死者萬餘人。漢書北至葉榆注澤名因以立號後為縣屬益州郡

始元五年大鴻臚田廣明等擊益州夷大破之以鉤町侯亡波為鉤町王

捕虜二萬餘人獲畜產五萬餘上曰鉤町侯亡波率其邑長人民擊反者斬百捕虜有功其立亡波為鉤町王大鴻臚廣明賜爵關內侯。鉤町益州郡縣後為寧川晉屬興古郡興古在唐為盤州近朱提徼外

宣帝地節元年武都白馬氏反使駱武平定之廢汶山郡置都尉

駱武平白馬羗因慰勞汶山吏及百姓詣武自訟一歲再度更賦至重邊人貧苦無以供給求省郡郡建以來四十五年矣武以狀上遂省汶山郡復置都尉。按華陽國志汶山郡東接蜀郡南接漢嘉西接涼州酒泉北接陰平即今茂州汶山縣是也在漢有綿虜縣成帝河平二年西南夷相攻以陳立為牂柯太守討平之

夜郎王興鉤町王禹漏卧侯俞更舉兵

相攻議者以為道遠不可擊乃遣太中大夫蜀郡張匡持節和解興等不從命刻木象漢吏立道旁射之杜欽說大將軍鳳曰蠻夷輕易漢使不憚國威恐議者選更復守和解則復曠一時使彼得收獵其衆以相殄滅自知罪成狂犯守尉遠藏温暑毒草之地雖有孫吳將育士若入水火往必焦没智勇無所施宜因其罪惡未成未疑漢家如誅陰敕旁郡守尉練士馬大司農豫調穀積要

害處選任職太守往以秋涼時入誅其王侯尤不軌者即以為不毛之地無用之民不以勞中國宜罷郡放棄其民絕其王侯勿復與通如以先帝所立累世之功不可墮壞亦宜因其萌芽早斷絕之及已成形然後戰師則百姓被害鳳於是薦陳立為牂柯太守立至諭告興興又不從立乃從吏數十人出行縣至興國召興至立數責因斷其頭出曉士衆以興頭示之皆釋兵降禹俞震恐入

粟千斛牛羊勞吏士興妻父翁指收餘兵迫脅二十二邑復反立討之威震南裔。鈞町漏卧漢屬牂柯郡後屬興古郡近朱提在叙州徼外今叙州有隙立祠

王莽始建國四年西南夷殺牂柯大尹莽篡位改漢制貶鈞町王以為侯王邯怨恨牂柯大尹周欽詐殺邯邯弟承攻殺欽州郡擊之不能服三邊蠻夷愁擾盡反復殺益州尹程降莽遣平蠻將軍

馮茂發巴蜀捷為吏士賦歛取足於民以擊益州出入三年疾疫死者什七巴蜀騷動莽徵茂還誅之

莽天鳳元年大發兵擊夜郎蠻不克越雋蠻亦殺其太守

莽更遣將大發天水隴西騎士十萬人擊之始至頗斬首數千其後軍糧前後不相及士卒飢疫復大賦歛而粵雋蠻夷任貴亦殺太守枚根自立為邛穀王光武建武元年公孫述稱帝粵雋任貴殺

大尹以城降於述

益州太守文齊牂柯功曹謝暹入貢

齊廣漢人為益州太守造起陂池開通
溉灌墾田二千餘頃降集蠻夷甚得其
和及公孫述擄成都齊固守拒險述拘
其妻子許以封侯齊遂不降聞光武即
位乃間道遣使自聞三蜀人姓龍傳尹
董氏與功曹謝暹保牂柯郡聞光武在
河北乃遣使自番禺江出奉貢漢朝世
祖嘉之號為義郎蜀平徵文齊為鎮遠

將軍封成義侯帝以齊有義特褒之於
道卒詔為起祠堂郡人立廟祠之

建武十四年以邛穀王任貴為越雋太守
建武十九年西南夷棟蠡及詔劉尚討之
尚誅任貴與棟蠡等連戰破之

夷渠帥棟蠡與姑復牒榆弄棟連然湏
池建伶昆明諸種反叛殺長吏益州太
守繁勝與戰而敗退保朱提遣劉尚等
發廣漢犍為蜀郡人及朱提夷合萬三
千人尚軍遂渡瀘水入益州界與棟蠡

等連戰數月破之追至不韋斬棟鬻首
邛穀王任貴恐尚定南方已不得自縱
因欲襲擊尚尚知其謀即分兵先據邛
都遂掩任貴誅之尚虜獲生口馬牛羊
甚衆○姑復牒榆弄棟屬雲南郡連然
滇池建伶昆明屬建寧郡朱提郡在廢
曲州令叙州宜賓縣接境建寧郡治味
有郁鄆縣屬叙州宣化縣接境餘見下
注華陽國志云不韋永昌郡治古哀牢
國建寧之極西南也

建武二十七年哀牢夷酋詣越雋太守鄭
鴻降封賢粟等為君長

牢山夷散在溪谷絕域未嘗交通中國
建武二十二年其王賢粟遣兵乘箬船
禰南下江漢擊附塞夷鹿芴鹿芴王與
戰殺其兄弟六人共埋之夜為虎食其
尸餘衆驚怖引去賢粟恐曰我曹入邊
塞自古有之今攻鹿芴輒避天誅中國
其有聖人乎天祐助之何其明也遂率
種人戶詣越雋太守求朝貢自是歲來

朝貢

明帝永平元年姑復夷復叛益州刺史發兵討破之傳首京師

太守安漢張翕政化清平得夷人和在郡十七年卒蘇祈叟二百人送喪至翕本縣安漢起墳祭祀詔書嘉美為立祠堂○蘇祈亦作蘇示如字屬越雋郡安漢今果州

永平十二年哀牢內附以其地置博南哀牢二縣始置永昌郡

哀牢王柳貌內附戶五萬西南去洛陽七千里割益州郡西部都尉所領六縣合為永昌郡始通博南山度蘭合水行者苦之歌曰漢德廣開不賓度博南越蘭津度蘭倉為宅人以廣漢鄭純為太守獨尚清廉豪毛不犯夷漢歌詠帝嘉之○古今注曰益州西部都尉居雋唐續漢志六縣謂不韋雋唐比蘇牒榆邪龍雲南也華陽國志博南山高三十里度蘭倉水也哀牢在寧川之極西南也

有閩濮鳩獠僮越裸濮身毒之民治不
韋縣寧州治味與朱提相接在今叙州
徼外味音昧

永平十七年白狼夷稱臣奉貢作詩歌誦
漢德益州刺史朱輔譯奏之

輔好立功名在州數歲宣示漢德威懷
遠夷自汶山以西前世所不至正朔所
未加白狼槃木唐菽等百餘國戶三十
餘萬口六百萬以上舉種奉貢稱為白
臣僕輔上疏曰白狼王唐菽等慕化歸

義作詩三章路經邛狹大山零高坂峭
色峻險百倍歧道臣輒譯其詞語謹遣
捷為郡掾暴護送詣闕并上其樂詩是
時邊郡官吏皆有雕飾畫山神海靈奇
禽異獸以眩耀之夷人益畏憚焉。白
狼在邛笮之外華陽國志曰邛狹山本
名邛笮故邛人笮人界也巖阻峻回曲
折乃至山上凝冰夏結冬則劇寒零高
坂即靈關道也寰宇記並在雅州廬山
縣

章帝建初元年哀牢夷殺守令反攻博南發永昌越雋益州三郡兵及昆明夷等擊破於博南斬之

哀牢王類牢等殺守令攻越雋太守王尋奔牂榆帝發越雋益州永昌夷漢九千人討之明年春邪龍縣昆明夷鹵承等應募率種人與諸郡兵擊類牢於博南大破斬之傳首洛陽賜鹵承帛万疋封為破虜傍邑侯。牂榆後屬雲南郡博南永昌郡

元和五年以王阜為益州太守始興學校於南中

阜治化尤異神馬四足出涪池河中甘露降白鳥見始興文學漸迂其俗尹珍者遠從許叔重受五經還以教授於是南域始有學焉

和帝永元六年敦忍乙王莫延慕義遣使獻犀牛大象

漢史哀牢夷傳

永元九年徼外蠻及檀國王雍由調重譯

入貢

賜金印紫綬小君長皆加金印綬錢帛
並附哀牢夷傳

永元十二年旄牛徼外白狼樓薄王唐繒
等內附

詔賜金印紫綬小豪錢帛各有差附笮
都夷傳。旄牛今黎州通望縣地

安帝永初元年徼外僬僥種夷陸類等內
附

獻象牙水牛封牛

元初元年蜀郡三襄種夷攻蠶陵城殺縣
令

蠶陵在翼州今茂州界

元初式年青衣道夷邑長令田舉國內附
令田與徼外三種三十一萬口齎黃金
旄牛旄舉土內屬安帝增令田爵為奉
通邑君。旄結毛為飾也音餌

元初三年越雋徼外夷大羊等舉種內附
種人三萬一千戶內屬

元初四年越雋夷反殺遂久令

漢史注云遂久故縣在今靡州界屬雲南郡唐盤州

元初五年永昌益州蜀郡夷叛應越雋夷詔益州刺史張喬討平之

三郡夷叛應封離衆至十餘萬破壞二十餘縣殺長吏焚掠百姓骸骨委積千里無人詔益州刺史張喬討之喬乃遣從事楊竦將兵至牒榆擊之先以詔書告示三郎乃與封離戰大破之斬首三萬餘級獲生口千五百人資財四千餘

萬悉以賞軍士封離等惶怖詣竦乞降竦厚加慰納其餘三十六種皆來降附竦因奏長吏姦猾侵犯蠻夷者九十人皆減死州中論功未及上會竦病創卒張喬深痛之乃刻石勒銘圖畫其象天子以張喬有遺愛拜其子湍為太守竦成都人也

永寧元年檀國王再遣使入貢

檀國雍由調獻樂及幻人能蠻化吐火自言我海西人海西即大秦也禪國西

通大秦明年元會安帝作樂於庭封由
調為漢大都尉

延光二年旄牛夷反攻零關張喬擊破之
於是分置蜀郡屬國都尉領四縣如太
守。旄牛屬今黎州零關在今雅州
桓帝建和二年白馬羗廣漢屬國殺長吏
益州刺史率板楯蠻討破之

秦時白虎為患夷胸忍等射之號白板
楯蠻

延熹二年蜀都三襄夷寇蠶陵

蠶陵在唐翼州衛山翼水兩縣古松州
悉州之間與茂州接境近西羗

延熹四年捷為屬國夷寇郡界益州刺史
山昱擊破之

靈帝熹平五年諸夷反執益州太守雍陟
詔以李顯為益州太守討平之

諸夷反執雍陟遣御史中丞朱龜將并
涼勁兵討之不克朝議以為郡在邊外
蠻夷喜叛勞師遠役不如棄之太尉掾
巴郡李顯建策討伐乃拜顯益州太守

與刺史龐芝發板楯蠻擊破平之還得
雍陟顯卒夷人復叛以廣漢景毅為太
守討定毅初到郡米斛萬錢漸以仁恩
米至數十云

獻帝建安十九年昭烈定成都以鄧方為
庠降都督

昭烈遣安遠將軍鄧方為朱提太守庠
降都督輕財果毅夷漢敬其威信

蜀漢昭烈帝章武元年以李恢為庠降都
督

鄧方為昭烈問伐於治中從事建寧李
恢對曰先零之役趙充國有言莫若老
臣遂用恢為都督治平夷縣。寰宇記
云平夷即興古郡華陽國志云建寧郡
治味音昧故庠降都督屯也味在唐為郎
州與朱提相接在今叙州徼外
後主建興元年益州都督雍闓等以四
郡叛

益州郡耆帥雍闓聞昭烈崩損殺太守
正昂以張裔為太守闓假鬼教曰張裔

府君如瓠壺外雖澤而內實麤殺之不
可縛與吳於是執送裔於吳吳王孫權
遙用闔為永昌太守永昌功曹呂凱府
丞王伉率吏士閉境拒守闔不能進移
檄永昌稱說云云凱荅檄曰天降喪亂
姦雄乘釁天下切齒萬國悲悼臣妾大
小莫不思竭筋力肝腦塗地以除國難
伏惟將軍世受漢恩以為當躬聚黨眾
率先啓行上以報國家下不負先人書
功竹帛遺名千載何期臣僕吳越背本

就未乎昔舜勤民事墮于蒼梧書籍嘉
之流聲無窮崩于江浦何足可悲文武
受命成王乃平先帝龍興海內望風宰
臣聰睿自天降康而將軍不覩盛衰之
紀成敗之符譬如野火在原蹈履河水
火滅冰泮將何所依附曩者將軍先君
雍侯造怨而封竇融知興歸志世祖皆
流名後葉世歌其美今諸葛丞相英才
挺出深覩未萌受遺託孤翊贊季興與
眾無忌錄功忘瑕將軍若能翻然改圖

易迹更步古人不難追鄙土何足幸哉
蓋聞楚國不共齊桓是責夫差僭號晉
人不長况臣於非主誰肯歸之耶竊惟
古誼臣無越境之交是以前後有來無
往重承告示發憤忘食故略陳所懷闔
不聽都護李嚴與闔書諭闔荅曰天無
二日土無二王今天下鼎立正朔有三
是以遠人惶惑不知所歸也其悖慢如
此使郡人益獲誘扇諸夷皆從之
梓柯太守朱褒越雋夷王高定皆叛應

闔諸葛亮以新遭大喪撫而不討務農
殖穀閉關息民民安食足而後用之

建興三年丞相亮南征斬雍闔遂平四郡

亮率衆南征參軍馬謖曰南中恃其險
遠不服久矣雖今日破之明日復反耳
今公方傾國北伐以事強賊彼知官勢
內虛其叛亦速若殄盡遺類以除後患
既非仁者之情且又不可倉卒也夫用
兵之道攻心為上攻城為下心戰為上
兵戰為下願公服其心而已自安上由

水路入越雋別遣馬忠伐牂柯李恢向益州高定自旄牛定笮卑水多為壘守亮欲侯定元軍眾集合并討之軍卑水定元部曲殺雍闓及士庶等孟獲伐闓為主亮既斬定元而馬忠破牂柯李恢敗於南中夏五月亮渡瀘進征益州生虜孟獲使觀營陣之間獲曰向者不知虛實故敗今祇如此即易勝耳乃七擒七縱而亮猶遣獲獲止不去曰公天威也南人不復反矣遂至滇池益州永昌

牂柯越雋四郡皆平亮即其渠率而用之或以諫亮亮曰若留外人則當留兵兵留則無所食一不易也加夷新傷破父兄死喪留外人而無兵者必成禍患二不易也又夷累有廢殺之罪自嫌讐重若留外人終不能信三不易也今吾欲使不留兵不運糧而網紀粗定夷漢粗安故耳亮於是悉收其豪傑孟獲等以為官屬出其金銀丹漆耕牛戰馬以給軍國之用終亮之世夷不復反冬亮

自漢陽還亮又為夷作國譜先畫天地日月君長城府次畫神龍乃牛馬羊後畫部主吏乘馬幡蓋巡行安邨又畫牽牛負酒齎金寶詣之之象以賜夷夷甚重之亮又為誓碑云碑若仆蠻為漢奴蠻人至今以石搯之。李膺益州記曰瀘水源出曲羅東下三百里兩峰有殺氣暑月舊不可行故武侯以夏渡為艱水經注曰瀘津水又東逕不韋縣北而東北流兩岸皆高山數百丈瀘峰竅為

高秀孤高三十餘丈時有瘴氣三月四月逕之必死五月以後行者差無害山海經云黑水之間若水出馬水沿流間關蜀土大度水徼外至大苻與若水合又有孫水名白沙江出臺登縣徑邛都縣入若水繩水又逕越雋之馬湖縣謂之馬湖江又東北至犍為為朱提縣西為瀘江水又東北至犍道縣入于江若水瀘水滄水孫水大度水淹水隨決入而納通稱正是吳水沿江通為一津更

無別川可以當之樂宇寰宇記云雋州會川縣有瀘津關關上有石峯高三丈四時多瘴氣

論曰多語瀘而不同何也酈道元之說在始昌不韋縣樂史之說在雋州會川縣以史觀之樂史之說是也蓋孫水若水繩水皆出于西北徼外而合于邛笮之間其山即瀘峯故唐吐蕃嘗屯三瀘水謂之三瀘以是三水也孔明之渡瀘別由越雋而入益州也益州即滇池連

然雲南等縣矣不韋縣在永昌郡又益州之極西南三瀘自越雋入朱提諸史所言皆然經益州界則有之若謂之逕不韋縣又謂瀘峯在不韋則誤矣樂史又以堡峯為瀘則擇焉不精矣渡瀘細事爾然非參稽舊史則未易知也

改益州郡為建寧郡分永昌置雲南郡牂柯置興古郡

以李恢為建寧太守加安漢將軍領交州刺史移治味縣丞相亮上表曰永昌

郡吏呂凱府丞王伉等執忠絕域十有餘年雍闓高定偪其東北而凱等守義不與交通臣不意永昌風俗敦直乃爾以凱為雲南太守伉為永昌太守以馬忠為犍柯太守。建寧郡治味縣郁郛屬焉今叙州宜賓界也雲南即古滇王國唐為姚州治弄棟川即漢弄棟蜻蛉縣地漢王褒求金馬碧鷄之神在此地也興古郡即唐盤州漢平夷縣地平夷北接味縣同樂升麻等地郡州又接曲

州即朱提縣朱提又接今叙州也
建興十一年以馬忠為庠降都督

庠降都督張翼用法嚴夷帥劉冑叛丞相亮以參軍馬忠代翼召翼令還其人謂翼宜速即罪翼曰吾臨戰場代人未至當運糧積穀為滅賊之資豈可以黜退之故而廢公家之務乎於是統攝不懈代到乃發忠因其資破冑漸之

延熙三年越雋太守張嶷平定越雋郡越雋自丞相亮討高定之後叟夷數反

殺太守是後太守不敢之郡疑為太守
 以計降其君長誅戮蘇定祚諸豪首繕
 治城郭蠻夷致力定祚臺登卑音班水三
 縣去郡三百餘里舊出鹽鐵及漆而夷
 徼久自固食歲率所領奪取置長吏焉
 延熙十年汶山平康夷反遣將軍姜維討
 平之

寰宇記云今維州城有姜維故壘唐武
 德七年白狗羗降附於姜維故城置維
 州

晉武帝泰始七年分益州地置寧州

武帝以益州地分廣分益川之建寧興
 古雲南之交州永昌合四郡為寧州太
 康三年又廢寧州入益州立南夷校尉
 以護之以天水李毅為校尉持節統兵
 鎮南中統五十八部夷族都監行夷事
 惠帝大安二年復置寧州分建寧以西
 七縣別立益州郡

光寧元年寧州五苓夷攻圍州城太守李
 毅卒

寧州頻歲饑疫死者以十萬計五苓夷
強盛州兵屢敗吏民流入交州者甚衆
夷遂圍州城李毅疾病救接路絕乃上
䟽言不能式遏寇虐坐待殄斃若不矜
卹乞降大使及臣尚存加臣重辟若臣
已死陳尸為戮時李雄作亂益州而所
在有事救援莫至毅卒毅女秀明達有
父風衆推秀領寧州事秀獎厲戰士嬰
城固守城中糧盡炙鼠拔草而食之伺
夷稍怠輒出兵掩擊破之

懷帝永嘉五年寧州刺史王遜滅五苓夷
初李毅死其子劉自洛往州人奉之以
主州事遣使詣京師求刺史朝廷乃以
遜為刺史既至表劉為朱提太守治南
廣時寧州內逼於李雄外有夷寇城邑
丘墟遜惡衣菜食招集離散勞徠不倦
數年之間州境復安誅豪右不奉法者
以五苓夷首為亂首圖計之未有致罪
會夷發夜郎莊王墓遜因此遂討滅之
及討惡僚剛夷數千落威震南方。莊

王墓即莊躡墓也楚威王遣莊躡伐夜郎遂王涓池涓王其後也南廣朱提漢屬犍為郡在今叙州徼外

愍帝建興二年夷王冲歸朱提雷炤建寧爨曷降于李雄李雄遣李驤破越雋伐寧州王遜破之

犍為太守朱提雷炤流民陰貢平樂太守董霸破牂柯平夷南廣北降李雄又建寧爨曷與益州太守李易梁永太守董謹保興古槃南以叛雄遣叔父驤破

越雋攻臺登縣遜使督護雲南姚岳距驤於堂螂縣達遜指授驤軍大敗嶽追之至瀘水赴水死者千餘人。堂螂朱提屬邑今叙州徼外有堂螂山瀘水馬湖江也

晉成帝咸和二年朱提太守楊術與李雄羅怕戰于臺登兵敗術死

臺登屬雋州今黎州徼外

咸和八年李壽拔朱提寧州刺史尹奉降于李雄

雄遣李壽攻朱提以費里為前鋒拔之
又遣鎮南任回征木落分寧州之援寧
州刺史尹奉降遂有南中之地惟牂柯
謝恕不為壽用遂保郡獨為晉官壽復
擊取之李雄以李壽領寧州威鎮南中
晉康帝建元元年李壽縱獠於蜀

事已見上蜀土無獠始從山出北至犍
為梓潼布在山谷十餘萬落不可禁制
大為百姓之患自此蜀之藩籬蕩然南
夷之事不可推訪矣惟蜀獠為患至唐

未猶見之史要不足採今不復錄

後周武帝天和四年平越雋置西寧州

遣大將軍鄭恪將兵平越雋因置郡。

李膺益州記云晉永嘉分崩李雄竊據

蜀地蕪廢將二十紀夷人侵軼獠又間

之公私路絕無可推訪後魏廢帝二年

始更招携民漸墾殖因僑立蒙山郡十

道志云魏晉以還蠻獠恃險鈔竊乍叛

乍服後周武帝征越雋又開其地因立

嚴州取其嚴敬為稱隨開皇四年改嚴

州為西寧州。蒙山郡今雅州。隨文帝開皇十七年，史萬歲擊南寧羗平之。

初，王謙反於蜀，梁睿討平之。西南夷獠莫不歸附。惟南寧州首帥爨震恃遠不服。睿上疏以為南寧州漢世牂柯之地，戶口殷衆，金寶富饒。梁南寧州刺史徐文盛為湘東王徵赴荊州，屬東夏尚阻未遑，遠略士民爨瓚遂竊據一方。國家遙授刺史，其子震相承至今。而震臣禮

多虧，貢賦不入。乞畧定南寧，帝未之許。其後南寧夷爨翫來降，拜昆州刺史。既而復叛，乃以左領軍史萬歲帥衆擊之。入自蜻蛉川，至于南中夷人前後屯據要害。萬歲皆擊破之。過諸葛紀功碑，度西溷河入渠，濫川行十餘里，破其三千餘部。諸夷大懼，遣使請降。獻明珠徑寸。於是勒石頌美。隋德萬歲請將爨翫入朝，詔許之。爨翫陰有二心，賂萬歲以金寶萬歲。於是捨翫而還。明年翫復反，上

欲誅萬歲翫懼入朝文帝誅之。紀功碑在拓東城西潁河在南詔所都城下即葉榆河也渠濫川在神龍河之西即湏池也

以梁毗為西寧州刺史

毗為刺史凡十一年蠻夷酋長皆以金多者為豪雋遞相攻奪略無寧歲毗患之後因諸酋長相帥以金遺毗毗置金坐側對之慟哭而謂之曰此物飢不可食寒不可衣汝等以此相滅不可勝數

今將此來欲殺我邪一無所納於是蠻夷感悟遂不相攻擊上聞而善之

蜀鑑卷第九

皇
朝

卷
九

三



